

20. godina Česke besede Sarajevo - NAŠIH DVADESET GODINA



Za Udruženje građana češkog porijekla/Spolek občanů českého původu „Česká beseda“ Sarajevo cijela 2016. godina je bila jubilarna. Dvadeseta godišnjica obnove rada proslavljena je svečanim programom u EU info-centru u Sarajevu 5.10.2016.g. i izložbom „Česi u Sarajevu“ – „Naših 20 godina“ 27.10.2016.g. u Zemaljskom muzeju.

Obilježavanje jubileja „Česke besede“ u EU info centru u Sarajevu



Šef Sekcije za politička i ekonomska pitanja iz Delegacije EU u Bosni i Hercegovini pan Jan Šnidauf prvi se prigodnom riječi obratio prisutnim članovima i gostima. Slijedio je osvrt ambasadora Češke Republike pana Jakuba Skalníka na doseljavanje Čeha na ove prostore bez kojeg danas ne bi ni postojala udruženja poput slavljeničkog. U okviru programa prikazana su dva kratka filma. Prvi je bio video-zapis o Parku nacionalnih manjina u Novom Sarajevu, a inicijator Parka je upravo „Česká beseda“. Drugi je prikazan dokumentarni film „Probuđene lutke“ posvećen češkim lutkarima koji su začetnici lutkarskih predstava u Sarajevu. To je posveta i svim Česima i njihovim potomcima koji su svojim znanjem i radom doprinijeli kulturnom i gospodarskom razvoju Sarajeva i Bosne i Hercegovine.



U muzičkom dijelu programa nastupili su Martina Milošević, Ivan Milošević i Adriana Katiavić izvedeci „Písničku českou“, „Když jsem já šel tou Putimskou branou“, ali i druge pjesme. Predsjednica „Česke besede“ Jovanka Manžalović Šalaka rekla je kako je viđeno na ovoj proslavi samo dio aktivnosti kojim Udruženje čuva češku kulturnu baštinu kako u Sarajevu, tako i u Bosni i Hercegovini. Ona je uručila zahvalnice onima koji su u proteklih 20 godina davali podršku radu Udruženja. U okviru suradnje s Umjetničkom galerijom Bosne i Hercegovine nastala je izložba „Ilustratori Nade“ čiji je dio prezentiran u EU info-centru otvorila kustosica Ivana Udovičić. Proslavu su svojim dolaskom uveličali češki etnolozi i dobitnici zahvalnice dr. Zdeněk Uherek i dr. Jana Pospíšilova.



Ostali dobitnici zahvalnica su: Ambasada Republike Češke u BiH, Franjevački samostan sv. Ante na Bistriku, Dragana Solaković iz Uprave Grada Sarajeva i Ljerka Latal Danon jedna od osnivačica Udruženja. Ovom je prilikom biblioteka „Česke besede“ postala bogatija zahvaljujući daru čeških etnologa. Moderatorica jubilarne proslave je bila Marijana Ušanović iz EU info-centra Sarajevo koji je program označio kao „Kulturno veče češke nacionalne manjine“. Među gostima su bili i predstavnici nacionalnih manjina iz Sarajeva i Tuzle. Iza službenog dijela programa mogla se razgledati izložba uz glazbu mladih muzičara i nazdraviti jubileju pivom Preminger koje je za koktel donirala Bihačka pivovara.



Obilježavanje jubileja „Česke besede“ u Zemaljskom muzeju u Sarajevu

U Zemaljskom muzeju u Sarajevu je 27.10.2016.g. otvorena 15. izložba iz ciklusa „Česi u Sarajevu“ – „Naših 20 godina“. Fotografije i tekstove za panoje birale su Jovanka Manzalović Šalaka, Gordana Frimel i Leona Sabolek dok je tehničku podršku pružio Igor Sivjakov. Panoi su pratili nove sadržaje iz rada „Česke besede“ u periodu od 1996.g. do 2016.g., ali su korišteni i neki stari panoi sa prethodnih izložaba tako da se mogla pogledati svojevrsna izložba u izložbi.



Izložbu „Naših 20 godina“ su otvorili ambasador Češke Republike pan Jakub Skalník i predsjednica Udruženja Jovanka Manzalović Šalaka. Tom prilikom su oni otkrili bistu prvog predsjednika Čehoslovačke Tomáša Garrigue Masaryka, dar pana Jaromíra Šlapote direktora instituta Československý ústav zahraniční. Predviđeno je da Masarykova bista krasí Park nacionalnih manjina, no ona će nakon zatvaranja izložbe privremeno naći mjesto u ambasadi Češke Republike u Sarajevu dok Općina Novo Sarajevo ne renovira park i odredi mjesto za njeno postavljanje. U svome obraćanju Jovanka Manzalović Šalaka je istaknula: " i zato hoću da verujem da će za nekih narednih dvadesetak godina neke nove generacije čeških potomaka obeležiti neki svoj jubilej, ko zna, možda baš u ovom divnom zdanju, vašeg, našeg i Paržikovog Zemaljskog muzeja".



Podpredsjednica za kulturu Leona Sabolek je pripremila tekst iz biografije omiljenog češkog državnika Tomáša G. Masaryka i pročitala ga nakon otkrivanja njegove biste. Izložbu su sa zanimanjem pogledali i ambasador pan Jakub Skalník kao i njegova zamjenica paní Klára von Kriegsheim Kadlecová. Nakon razgledanja, slijedilo je druženje svih okupljenih na obilježavanju vrijednog jubileja u Muzeju. Koktel, naravno, nije mogao proći bez češkog piva iz Bihačke pivovare i obavezne Becherovke.